

Na osnovu člana 95. i 96., a u vezi sa članom 7. stav 1. alineja 28. i člana 13. stav 1. alineja 1. Zakona o Poreznoj upravi Federacije Bosne i Hercegovine ("Službene novine Federacije BiH", broj 33/02), federalni ministar finansija - federalni ministar financija donosi

## **PRAVILNIK O USLOVIMA, POSTUPKU I NAKNADAMA ZA MIŠLJENJA POREZNE UPRAVE**

(„Službene novine Federacije BiH“, broj: 54/03)

### **I - OPĆE ODREDBE**

#### **Član 1.**

Ovim pravilnikom bliže se uređuju uslovi, postupak i naknade za mišljenja koja Porezna uprava Federacije Bosne i Hercegovine (u daljnjem tekstu: Porezna uprava) izdaje poreznom obvezniku.

#### **Član 2.**

Mišljenje koje Porezna uprava izdaje poreznom obvezniku je dokument kojim se daju dodatne informacije u vezi primjene federalnih i kantonalnih poreznih zakona i podzakonskih akata u složenijoj situaciji.

Mišljenje koje izdaje Porezna uprava odnosi se na jednu određenu poreznu situaciju i na jednog određenog poreznog obveznika, a mora biti u skladu sa stavovima Federalnog ministarstva finansija - Federalnog ministarstva financija odnosno mjerodavnog kantonalnog ministarstva finansija.

#### **Član 3.**

Odredbe ovog pravilnika obavezuju sve porezne obveznike i Poreznu upravu.

### **II - USLOVI I POSTUPAK ZA PODNOŠENJE ZAHTJEVA ZA IZDAVANJE MIŠLJENJA**

#### **Član 4.**

Zahtjev za davanje mišljenja Porezne uprave radi rješavanja određene porezne situacije može podnijeti porezni obveznik ili njegov ovlašteni predstavnik.

Porezna uprava neće izdati poreznom obvezniku traženo mišljenje kada se radi o pitanju koje je u tom času predmet inspekcijuskog nadzora ili prigovora na zapisnik

ili žalbe koja se nalazi u postupku rješavanja od strane Porezne uprave.

#### **Član 5.**

Zahtjev za izdavanje mišljenja podnosi se u pismenom obliku.

Zahtjev se može podnijeti poštom preporučeno ili predati lično bilo kojem uredu Porezne uprave.

Zahtjev se označava "ZAHTJEV ZA MIŠLJENJE" i upućuje se odnosno predaje Poreznoj upravi - Središnji ured u Sarajevu odnosno putem najbliže organizacione jedinice Porezne uprave (kantonalnog ureda ili ispostave Porezne uprave).

Potvrda pošte o prijemu zahtjeva ili od strane poreznog ureda ovjereni primjerak zahtjeva, dokazi su o danu slanja odnosno predaje zahtjeva.

#### **Član 6.**

Zahtjev mora sadržavati sljedeće podatke:

- ime/naziv podnosioca;
- punu adresu;
- identifikacioni broj;
- broj telefona i e-mail (ako ga porezni obveznik ima);
- jasno formulirano pitanje povodom kojeg se traži mišljenje;
- vjerodostojne informacije koje su povod za traženje mišljenja;
- opis svih činjenica i okolnosti od uticaja za rješenje poreznog pitanja, te tačan naziv porezne obveze odnosno vrste poreza i porezno razdoblje na koje se odnosi porezno pitanje.

Ukoliko porezni obveznik raspolaže određenim mišljenjem po istom pitanju koje je izdala Porezna uprava ili mjerodavno ministarstvo, tada je uz zahtjev dužan priložiti takvo mišljenje, pismeno objašnjenje i svu drugu dokumentaciju na kojoj se takvo mišljenje formalno - pravno zasniva.

#### **Član 7.**

Ukoliko je zahtjev za izdavanje mišljenja nepotpun, Porezna uprava je dužna od podnosioca zahtjeva zatražiti da u roku od osam dana od dana prijema upotpuni zahtjev.

Od podnosioca zahtjeva koji zahtjev predaje lično, Porezna uprava može zatražiti usmeno da zahtjev upotpuni, a kada se zahtjev dostavlja putem pošte, Porezna uprava je

dužna podnosiocu dostaviti pismenu obavijest kojim će zatražiti da se zahtjev upotpuni u roku od 8 (osam) dana od dana prijema zahtjeva.

Ukoliko podnosilac zahtjeva u određenom roku zahtjev ne upotpuni, smatrat će se da zahtjev nije ni podnesen.

Rok za izdavanje mišljenja počinje da teče od dana prijema upotpunjenog zahtjeva.

#### **Član 8.**

Porezna uprava je dužna izdati mišljenje o pitanju navedenom u zahtjevu i kada smatra da zakonski propisi jasno ukazuju kako obveznik poreza treba u datoj situaciji postupiti, ili kada se smatra nemjerodavnom za davanje takvog mišljenja.

U takvoj situaciji Porezna uprava je dužna u roku od 30 (trideset) dana od dana prijema zahtjeva podnosiocu dostaviti pismeni odgovor u kojem će navesti i odredbe zakona i podzakonskih akata koji dati porezni problem regulišu, odnosno navesti naziv institucije kojoj se može obratiti radi rješavanja poreznog problema.

#### **Član 9.**

Podnesenim zahtjevom podnosilac može tražiti mišljenje u vezi jednog ili više poreznih pitanja.

Kada se istim zahtjevom traži mišljenje u vezi više poreznih pitanja, smatrat će se da je podneseno onoliko zahtjeva za koliko se pitanja traži mišljenje.

#### **Član 10.**

Izdano mišljenje o određenom poreznom pitanju obavezuje Poreznu upravu i poreznog obveznika da postupe u skladu sa izdatim mišljenjem, i to u onoj mjeri u kojoj su činjenice i okolnosti koje je predočio porezni obveznik tačne i istinite, odnosno ukoliko je dato mišljenje u skladu sa stavovima mjerodavnog ministarstva.

#### **Član 11.**

Mišljenje na temelju zahtjeva poreznog obveznika izdaje ovlašteni službeniku Središnjeg ureda Porezne uprave u roku od 30 (trideset) dana od dana prijema zahtjeva.

Ukoliko Porezna uprava nije u mogućnosti udovoljiti zahtjevu u roku iz stava 1. ovog člana, dužna je obavijestiti o tome podnosioca

prije isteka tog roka i navesti drugi rok za izdavanje mišljenja.

#### **Član 12.**

Uz podneske koje upućuje Poreznoj upravi, a koji se na bilo koji način tiču poreznih pitanja riješenih mišljenjem, porezni obveznik je dužan priložiti mišljenje koje je dobio od Porezne uprave.

### **III - NAKNADE**

#### **Član 13.**

Za mišljenje Porezne uprave o jednom poreznom pitanju plaća se naknada u iznosu od 50,00 KM (pedeset KM).

Naknada se uplaćuje na račun javnih prihoda budžeta Federacije Bosne i Hercegovine: 154-001-11006614-92 putem naloga za plaćanje sa oznakom vrste prihoda: 722631 i uz obavezno unošenje broja: 1603001 u polje 15 - "Budžetska organizacija", a kao svrhu doznake unosi se tekst: "Uplata naknade za mišljenja Porezne uprave".

Podnosilac zahtjeva je dužan uz zahtjev za izdavanje mišljenja priložiti primjerak naloga o uplaćenju naknadi.

### **IV - DOSTUPNOST MIŠLJENJA JAVNOSTI**

#### **Član 14.**

Mišljenja o pojedinim poreznim pitanjima koja su izdata na zahtjev poreznih obveznika Porezna uprava može dati na objavljivanje u službene oglase Federacije BiH ili u druge stručne časopise i publikacije, pod uslovom da se ne otkriva identitet poreznog obveznika po čijem zahtjevu je mišljenje izdato, kao ni porezna tajna.

### **V - ZAVRŠNE ODREDBE**

#### **Član 15.**

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj: 05-02-3143/03 30. septembra 2003.  
godine Sarajevo

Ministar **Dragan Vrankić**, v. r.